

A PIAZZETTA

Un giornale scherzoso, puliticamente scurrettu è certe volta appena gattivu...

U PRIMU TABLOID
GRÀTISI IN
LINGUA CORSA

**LUTTEMU
CONTR'À QUELLI
CHÌ ÒN METTENU
MAI A SOIA !**

**NO !
UN LI
SERVIMU PIU !**



bettunizemu



**Minacce nant'à
u liturale**

chì diventate ?



**Patrick Valery :
Da a D1 à Croq'O'Pain**

attualità corsa

**A pippulizzazione
di i nomi di i zitelli**



A PIAZZETTA hè un giornale gràtisi chì esce tutti i dui mesi, publicatu grazie à u premiu Ghjovani in Mossa.

Hè editatu da :

L'associu Lingua Scritta
 Res. Orezza 2 20200 Bastia

Hè realizatu da :

Una squadra di benevolententi

Hè statu stampatu in Corsica à

10 000 esemplarii :

Stamperia AZ Diffusion
 Erbaghjolu 20600 Bastia

A Piazzetta hè dinù un situ internet :

www.apiazzetta.com
 apiazzetta@free.fr

U disegnu di Sbundacageot



Glacier

Café

Idéal

Piazza di u mercà di Bastia

U Ministru
Giapponese
di e Finanze



Dopu à Nicolas Sarkozy in u 2007, hè u ministru giapponese di e finanze chì hà fattu una cunferenza di stampa briacu merzu à u G8. Ma ùn hè micca piaciuta à tutti è li hè custatu u so postu di ministru. Ma chì leone !

U SDF patriottu

Dopu à a manifestazione di u 4 d'aprile in Bastia, MAM avia prumessu sanzioni ràpide per punisce l'azzuffi chì anu feritu 70 pulizzeri. Ùn sò state tantu à cascà : un machjaghjolu SDF chì tirava petre nant'à i CRS hè statu incarceratu. Facia solu dui mesi chì u disgraziatu si truvava in Corsica. Hè ciò chì certi chjamanu a « communauté de destin »...

A Squadra Naziunale Corsa

Hè u giornale Corse Sport à avè annunziatu u riturnu di a squadra nazionale corsa di ballò. Giuly, Modesto è d'altri anu accettatu d'esse selezionati. À quandu una rivincita Corsica - Francia ?

Quellu chì inventa i
cuncorsi à Corse-Matin

U Presidente
Wacogne

Jacques Séguéla



Hà dichjaratu chì «sì à cinquanta anni ùn s'hà una Rolex, s'hè omu mancatu a so vita». È senza casa in Cala Longa ?



Grazie à u vostru cutitianu, si pudia vince un ripastu in capu à capu cun Antoine Sindali, Georges Mela o Emile Zuccarelli. Francamente, chjamate què un «premiu» voi ? Sì pudia sperà megliu, nò ?



Hè stata cusì ridicula l'attitudine di u ghjudice Wacogne durante u prucessu d'Yvan Colonna ch'ellu hè ancu statu disprezzatu da i giornalisti francesi. Sì ancu Le Figaro a dice..

Minacce nant' à u liturale

Prumutori immobiliari, turisti, pippol, Corsi chì vendenu a so terra o chì facenu custruisce à bor'di mare, maffia chì vole sbiancà, golfs, quad infuttenti chì sciappanu tuttu... Prutettu è priservatu à pocu pressu bè sin'à pocu, u liturale corsu ci la ferà à resiste à tutti sti periculi ?



Un liturale sempre prutettu...

A Corsica, i so 1000 chilòmetri di coste chì s'anu francatu a bettunizzazione frenètica di l'anni 70. Basta à vede u liturale spagnolu o quellu di a Côte d'Azur per vede ciò ch'è no avemu mancatu : urbanizzazione anàrchica, grandi cumplexi immobiliari à bor'di mare, natura distrutta per sempre. In l'Agriate, in punta di Capicorsu o trà Bunifaziu è Portivechju, sò grande banche francese (Rotschild, Lefèvre...) à avè compru chilòmetri è chilòmetri di terreni vèrgini è à avè prugetti di speculazione (prugettu di 800 letti in Acqua Tignosa, Cavaddu...). Per via di a mubilizzazione di i Corsi è di i naziunalisti in particulare, sti prugetti ùn videranu mai u ghjornu. Sinu à avà...

...ma chì attira l'appittiti

Un liturale cusì prutettu attira l'appittiti. Francata a bettunizzazione di l'anni 70 è 80, volta u periculu di u bettone. I soldi per i prugetti, ci sò. Sbarcanu l'investiscidori chì a paura di e bombe ùn ci hè più. Nunda di megliu chè l'immobiliare per u sbiancamentu di soldi « brutti »... I pulitichi elli ùn si facenu pregà per autorizà i permessi di custruisce.

Turisimu = soldi in furia... ma per quale ?

U turisimu saria di siguru una di l'attività chì parmetterianu di sorte a Corsica di u so sottu sviluppu ecunomicu... à cundizione ch'ellu sia pensatu bè. Pigliate un pezzu di liturale, mettiteci un ottellu, dui ristoranti, un bar. For'di

i patroni di i stabilimenti (sempre i listessi, d'altronde) quantu create impieghi fissi, chì ùn duranu micca solu u tempu d'una magra stagione ? U destinu di i figlioli di stu paese saria di diventà garçon de café è rivinderolu di panini ? U turisimu pò purtà soldi in furia. Ma per chì impieghi ? È à prezzu di distrughje a natura di manera definitiva ?

Sempre di più turisti... per mette induve ?

Avemu battutu annu passatu u record di turisti. Quist'annu ci spieganu ch'ellu si circherà di fà megliu. Sempre di più battelli, sempre di più low cost, sempre di più turisti... ma per mette induve ? Spassighjatevi u 15 d'agostu in Palumbaghja è circate di truvà un locu per mette a vostra servietta. D'agostu, u liturale corsu hè sopraffrequentatu è saturatu. È s'ellu si cercava piuttosto d'allungà a stagione, no ?

Bettunizzazione... o mitage ?

Si parla sempre di bettunizzazione, ma u male chì minaccia a Corsica ùn sò micca i grandi cumplexi turisticchi cum'ella i cunosce a Spagna. U « mitage » hè u termine chì dice a custruzione di picculi gruppi di case. Forse micca impressiunante in un primu tempu, ma divastatore. Basta à fidighjà ciò ch'elle sò diventate e culline sopr'à Portivechju o San Fiurenzu.

Vergogna à tè chì vendi a terra nant'à ebay ?

Cunniscite a famosa canzona di Canta u Populu Corsu. Invece di fà u rimbeccu à quelli chì vendenu, soca, ci vulerà ancu à capisceli. Per u più ùn sò micca prumutori manghjoni ma ghjente in u bisognu. Per campà, li tocca à spulà u so casale. Allora culpèvuli o vittime di u sottu sviluppu?

I Corsi Fora !

I prezzi di l'immobiliare cuntinuveghjanu di cresce in Corsica, in piaghja ma dinù in i paesi di l'internu. Ma vistu a situazione ecunòmica di l'isula, quale pò cumprà ? S'è vo ùn avete micca Rolex, vi sterete piuttosto in Lupinu ch'è in Sant'Amanza. Ogni ghjornu casali è terreni sò vinduti à ricchi strangeri in brama di natura è di sole. È quelli chì vendenu sò cuntenti, si ponu cumprà l'ultima Audi.

A lege liturale... chì u Statu ùn vole micca fà rispettà

Hè stata vutata in u 1986 per parà l'ultimi lochi vèrgini di u liturale. S'hè avvistatu omu chì in funzione di i soldi è di l'amicizie, era appiegata o calpighjata. Basta à andà in u meziornu di a Corsica, e bettoneuses giranu à menu di 100 metri da u mare. Purtantu, hè illegale. Ma chì face a pulizza ? Si mancu i prefetti ùn volenu fà rispettà e legi di a Ripublica, allora...

I terreni agrìculi... per fà pasce u bettonu

E terre agrìcule sò in teuria riservate à l'agricultori (lògica) è dunque micca costruttibili è menu cari ch'è lochi costruttibili. Prublema : parecchi si sò cumprati terreni agrìculi aspettendu ch'elli sianu resi costruttibili. Basta à avè appena di pazienza è amicizie pulitiche. Oghje, diventa difficiulissimu per un giovanu agricoltore di truvà terreni in piaghja. Bah, u ghjornu induve seremu veramente famiti, mangheremu i turisti.

A pippulizzazione

St Trop ? Troppu mondu, troppu caru ! Allora u populu di i pippol s'hè messu à migrà versu a Corsica. Avà, si vedenu l'estate in e pagine di Corse-Matin, laudendu a bellezza di u paisaghju è l'autenticità di i Corsi. Purtantu, sò belli luntani da u populu, in i so bunker pè ricconi. Kouchner, Clavier, Reno, Séguéla, Mylène Farmer... Tuttu ciò chì a Francia face di peghju scala qui. È noi, poveri disgraziati impressiunati da quelli chì passanu à a télé, li femu e manere.

I golf

Nunda di megliu ch'è un picculu golf a sera dop' à u travagliu, neh ? Cumu ? Ùn site abbastanza riccu ? Peghju per voi. Oghje sò sei i prugetti di golf : dui in Portivechju, Olmetu, Bunifaziu, E Valle di Campulori è Olmeta di Tuda. À l'ora di u « sviluppu durèvole », ùn hè quantunque micca terribule. Paisaghju sfragellatu, spesa tremenda in acqua... Bon, puderete sempre dumandà una piazza di muzzu per trascinà u caddy di i ricchi ghjudadori.

A Maffia

I capitali per u sbiancamentu ci sò. I terreni belli dinù. A maffia ùn aspetta ch'è quessa : investe in l'immobiliare. In Spagna, a cità di Marbella hè cunnisciuta per esse

una basa di a maffia russia in Auropa occidentale. L'immobiliare si presta cusì bè à u sbiancamentu di soldi brutti è a curruzzione hè cusì forte chì un gigantescu scandalu hè schjattatu pocu tempu fà. Si parla di 40 000 alloggi costruiti in l'illegalità. È in Corsica ? Ùn v'inchietate, ci dicenu chì maffia ind'è noi, ùn ci n'hè. Hè cum'è u nulu di Chernobyl, s'hè piantatu à a frontiera !

U populu di u Quad contr'à quello di u Jet

A crisa di petroliu ci la ferà à tumbà a moda di i sport mecànichi ? Micca per avà... In più di a pulluzione sonora, i quad è i jet-ski rapresentanu una vera minaccia per l'ambiu.

È in altrò ? Si distrughje !

À un mumentu chì furiscenu da per tuttu prugetti immobiliari, hè forse interessante di vede ciò ch'ellu si face in altrò. In Sardegna l'ex presidente di a regione Renato Sorru vulia purtà a banda d'incustruttibilità à 2 chilòmetri. In Spagna, u governu hà fattu passà una lege pè ricuperà i terreni di bor'di mare pè distrughje e costruzioni più goffe. Ma di sicuru, cum'è no avemu sempre 20 anni di ritardu, si pò sperà chì versu 2030 si puderà distrughje ciò ch'è no semu in traccia di custruisce avà...


L'anu detta nant'à apiazzetta.com

A Corsica ùn hè micca
à vende HÈ DIGIÀ
VINDUTA, ùn ci hè chè da
fighjà a carta di u paduc
per accorghjesine : TUTTU
HÈ VINDUTU
(antone)

hè u soldu chì hè a colpa di tuttu !
Si vendenu e terre, ma si sò ancu
vinduti l'anima, ùn videte ch'ellu ùn
ci hè più un palmu di nettu !
(estremei)

di tutte e manere, avemu da finisce
in e nostre riserve cum'è l'indiani. ci
lamperanu e cacahuètes, è u peghju,
è ch'è no l'avemu da manghjà...
(cardone)

Dumè Gambini



A Google Map di a bettunizzazione in un colpu d'ochju : PADDUC, prugetti immobiliari, golf, case di pippol, « désanctuarisation » è festa ind'è Clavier, nant'à www.apiazzetta.com

« U PADDUC hè un pianu destinatu à pruvucà un « boom » demograficu nant'à u liturale »

Site unu di l'animatori di u Cullettivu per a lege liturale chì hè membru di u « Fronte Unitu Contr'à stu PADDUC ». Chi sò i vostri argomenti principali ?

U PADDUC cuntene un capitolu intitulatu « Modalités d'application de la loi littoral ». Di fattu, u Cullettivu chì

ne facciu parte cù l'associu U Levante hè dunque cuncernatu. Sapendu dinù chì e cartografie produtte in stu documentu, à u livellu di u Schéma d'Aménagement di a Corsica, sò assai assai inchietante. Rapresentanu a traduzione spaziale di a « disanctuarisation » annunciata da u presidente di l'Assemblea è lucalisanu e terre sottumesse à « l'ecunomia residenziale » sinonimu « d'ecunomia immobiliare » di u pianu di sviluppu.

Perchè dumandate u ritiru francu è chjaru di u prugettu cuncipitu da u Cunsigliu Esecutivu, allora ch'è vò puderate prupone ammendamenti à l'Assemblea ?

L'ammendamenti à mette in ballu

sò cusì numerosi ch'ellu ci vuleria à riscrive sanu sanu u PADDUC, un ghjuverianu pocu è micca : seria solu per pruvà à fà crede à l'opinione publica chì cù qualchì piccula mudificazione, u PADDUC seria un bon' documentu.

Face un pezzu chì l'associu U Levante s'hè pusiziunatu per l'appiegazione stritta di a lege Liturale. Ciò ch'è vo precunizate pò esse, secondu certi, un frenu per u sviluppu di a Corsica.

Iè, ghjè un sbagliu d'interpretazione chì certi si piacenu à sparghje. A lege liturale hè una lege d'urbanisimu. Òn interdise micca a custruzzione. Hà per scopu d'organizzalla, rispettendu e zone protette, imponendu a custruttibilità in

continuità di l'esistente o di « hameau nouveau » è limitendula nant' à i spazii vicini à u mare. A lege liturale hè stata vutata à l'unanimità da u Parlamentu per appiegassi à tutti i tippi di litorali in Francia.

« Ùn si tratta micca di
« certi spazii » ma di
tutta a Corsica ! »

Cosa ne pensate voi di u cambiamentu prupostu da u Cunsigliu Esecutivu ghjuvendu à fà passà certi spazii cuncernati da a lege liturale sottu à e dispusizione di a lege muntagna ?

Ùn si tratta micca di « certi spazii » ma di tutta a Corsica ! Sta dumanda di cambiamentu, ch'hà messu in ballu l'Esecutivu, traduce a so vuluntà di fà sparisce a lege liturale da u paisaghju legislativu isulanu.

Dite ch'ellu ci vole à mantene l'Atlas di i spazii rimarchèvuli tale chì u Statu l'avìa stabilitu. Tandù, ùn si piglieria micca in contu e dumande di cambiamentu da i merri di certe cumune liturale. Perché ?

L'Atlas sò stati stabiliti da a DIREN (Direction Régionale de l'Environnement) è a DDE (Direction Départementale de l'Équipement) dopu à spertizie fatte da zoologi, botanisti, geografi, paisagisti è dunque scientifici indipendenti. L'Atlas sò accumpagnati di fische ghjustificative. L'avvisi d'associi di prutezzione di l'ambiu è di tutti i merri sò stati sullicitati à partesi d'Atlas pruvisorii. Tandù, i merri anu pussutu fà mudificà e cartografie è certi ùn si sò privati di fà la, cum'è per indettu Sari Sulizara è Portivechju.



L'Atlas sò dunque documenti validati postu ch'elli sò ghjustificati. Per avà, ùn avemu mai trovu spiegazione scintifiche à u livellu di e suppressione di spazii rimarchèvuli cunstate nant' à i Piani Lucali d'Urbanisimu (PLU).

Dite ancu chì daretu à u sclassificamentu di certi spazii rimarchèvuli è l'avvicinanza di a limita di i spazii à bor'di mare, ci sò pruggetti immobiliari impurtantissimi. Ma cumu a sapete ?

L'associi membri di u Culletivu per a lege liturale s'interessanu à i piani d'urbanisimu cumunali, vale à dì i PLU è e carte comunale. Sti documenti localizeghjanu è descrivenu i pruggetti immobiliari. È cunstatemu chì quandu un spaziu rimarchèvole hè suppressu, a zona diventa cunstruttibile cù un pruggettu numinativu. Si pò truvane una lista nant' à u site Internet di U

Levante (<http://levante.fr>).

Pensate chì u PADDUC serà finalmente aduttatu ?

Quale a sà ? A Corsica hà bisognu d'un veru PADDUC ma l'avvene di l'isula serà assai difficiule s'è stu PADDUC quì hè aduttatu.

S'è vò avete un solu argumentu à fà valè contr'à stu PADDUC, chì seria ?

U PADDUC hè un pianu destinatu à pruvucà un « boom » demograficu nant' à u liturale, segundu à u pianu nauticu di u 2005. L'internu di l'isula hè sminticatu, disprezzatu.

Intervista realizzata da l'Alisgianincu

Scola di Cantu Cas'Arcusgi

Piazza di u Mercà di Bastia

Apprentissage de la polyphonie (Paghjelle, Messa nustrale...)

Apprentissage du chant monodique (Lamenti, Serenati...)

Renseignements : 06 18 44 34 31 ou 06 18 93 06 98

I Basgiadori FORA !

Quessa po a mossa ùn l'averete pussuta nè ignorà nè mancu schisà : sti poc'anni ci hè statu a generalizzazione imbattèvule di a basgiata trà di l'omi corsu...

Soca l'aspettu mediterraniu o ancu maffiosu (diceremu piuttosto maffiusellu) di i basgiacci in trà d'omi hà seduttu à unepochi. À unepochi è ancu à tutti sì ! Avà ne simu tutti à basgiate spripusitate. Ci basgemu tutti à vòline più, è più si hè azezu è barbutu, più si puzza, più si hè sfacciatu, è più si basgia à n'importa quale. È basgia chì ti basgia, à labbre pulpose sempre di più stinzate versu u primu catinu chì ti sbarca in faccia.

« Evviva a strinta di manu à l'usu corsu ! »

Quantu ci n'hè chì li sciaccate dui basgi senza mancu sapè quale sò, è ancu peghju certe volti, cumu si chjàmanu ?

Aiò o zitè, fèmula finita avà cun tutti sti basgiucci di feminette. S'elli ci vèdenu da quassù, quelli di Pontenovu... Ch'anu da pensà i Sampieru, Paoli, Sambucucciu è Cardone ? A v'aghju da dì, ci anu da piglià à tutti per finochji.

Alè o zitè, fèmuci onore è circhemu di ritruvà un pocu di sensu, di stintu è di maccisimu : tucchèmuci a manu, cum'è i veri Corsi azezi è puzzicosi ch'è no simu. Evviva a strinta di manu à l'usu corsu !

L'anu detta nant'à apiazzetta.com

Seria ora di piantà appena sta cumedia finuchjesca di u « on se basge entre fratè ». Chì vergogna, quantu ipucrisie ! Hè bella più sincera una strinta di manu. Avà hè decisa, u prussimu chì vene à basgiammi, li sciaccu una capata !
(capicursinu)

In più, sò à spessu basgi di Ghjuda ! Allora o maschi, i vostri basgi teniteli per noi altre !
(piratella)

Ci vole à fà i t-shirt : « s'è tù mi basgi, ti mengu », « la bise c'est pour les Gaulois », « u veru Corsu ùn face micca a bise »
(avà basta)





A Piazzetta hè un giornale **GRATISI**, fattu da una squadra di **BENEVULENTI**.

Tiratu à 10 000 esemplarii, hè distribuitu in parechji lochi di Corsica.

S'è vo vulete aiutacci, pudete abbonarvi à u nostru giornale per ricevelu in casa vostra.

Nome : _____ Casata : _____

Indirizzu : _____

Codice pustale : Cumuna : _____

6 nùmeri (15 €)

Sustegnu (40 €)

Mandate u vostru sceccu à l'ordine di :

L'Associu Lingua Scritta
1, ruelle du Dragon
20200 Bastia



Patrick Valery

Da a D1 à Croq'O'Pain



Dapoi a so ritirata spurtiva in u 2002, Patrick Valery ùn hà tantu persu cuntattu cù i terreni di ballò è ferma più ch'è mai u rè di a panetta turchina !

Si passatu da i terreni di D1 à Croq'O'Pain, chì effettu ti face ?

Cosa credi tù ? Ghjucà in D1 era più faciule ch'è di travaglià à Croq'O'Pain. Ma mi campu listessa. Sai, si trovanu parechji « gabarits » quì dinù. È ogni ghjornu, vendu panette, invece chì prima e facia di rigalu...

U ballò professionale ùn ti manca micca troppu ?

Iè, bella sigura... Ma ùn aghju tantu persu cuntattu cù i terreni di ballò, postu chì per fortuna allenu i giovani di u centru di furmazione di u Sporting. Tandù, hè un veru piacè di sparte a mo passione è di cuntinuà à esse un leone, ancu s'è a vechjaia si face sente avà...

Ere un ghjucadore ch'ùn si lasciava micca rompe e stacche, ere apprezzatu da u publicu per u to impegnu è u to ghjocu certe volte appena duru. Finalmente, ghjè ciò chì manca u più à u Sporting in sta stagione, nè ?

Forse chì certi ghjucadori ùn si danu micca di rimenu cum'ellu ci vuleria. Prima « mouiller le maillot » avia veramente un sensu. Oghje l'affare mi pare diferente...

« Ghjucà in D1 era più faciule ch'è di travaglià à Croq'O'Pain »

Ghjustappuntu, si sente assai di ch'ùn hè più cum'è vint'anni fà : intimidazione in u curridore, colpi, cazzotti è sciambuloni gratisi... Ùn trovi micca chì u ballò mudernu diventa di menu in menu interessante ?

Era più passiuante prima chì si vidianu l'omi, i veri ! Ùn vogliu micca di chì u ballò oghjincu hè senza valore.



**A festa di u pane !
di u 11 à u 17 maghju
ind'u vostru panatteru**



**SYNDICAT
DE LA BOULANGERIE
PÂTISSERIE
DE LA CORSE DU SUD**

Ma à l'epica, quandu eo ghjucava, era più fulcloricu cù assai effetti d'intimidazione. Avà, ùn sì pò più fà nunda, ci sò e camerà ignilocu. È u minimu gestu o a minima parolla di traversu porta subitu à una cunvucazione davanti à a Federazione. Peccatu ch'ellu sia diventatu cusì...

È cosa ti face d'avè l'etichetta d'un ghjucadore « gattivu » ?

Aiò, cumenci à annerbà mi cù e to dumande storte... Ùn sò mai statu gattivu. Era piuttosto un ghjucadore simpaticu chì difendia a so squadra cù brama è passione. Cusì aghju cartunatu, mi !

Calma ti puru o Patrì è pruvemu à parlà seriu, allora. Segondu à tè, u SCB in ligue 1 « orange » in u ballò di Thiriez è d'Aulas, hè torna pussibile ?

Ùn i stò tantu à sente sti dui quì. Cumè certi ghjucadori è dirigenti, pensanu appena troppu à i soldi, scurdendu si di u più impurtante : u ballò ! Eo, ci credu assai à u riturnu di u SCB in ligue 1. Sforzi sò stati digià fatti à u livellu di l'organizzazzione di u club. Ci tocca à cuntinuvà, cù u tempu è sopr'à tuttu a passione. Duvemu ritruvà l'anima turchina. Forse si pò fà...

U to più bon ricordu cù u Sporting ?

Ci n'hè parechji, ma riteneraghju a prima annata, quandu sò ghjuntu in Bastia, in u 1996, nanzu di parte in Inghilterra. C'era una ambianza di quelle, cù Drobnjak, Swierczewski, Eydelie, Rool, Perez o ancu Moreau. Tutti furmavam u vera squadra, eramu uniti nant'à u terrenu cumè in a vita di tutti i ghjorni. Inseme, ci simu campi, riescendu d'altronde una bella

stagione...

U peggju ?

Ùn aghju tantu gattivi ricordi, ùn rigrettu alunu mumentu. Ma m'hè quantunque dispiaciu di piglià a mo ritirata spurtiva...

U più bon ghjucadore cun quale ai ghjucatu ?

L'attaccante inglese Glenn Hoddle chì simu stati campioni di D1 inseme in u 1988, cù a squadra di l'AS Monaco allenata à l'epica da Arsene Wenger.



« A Corsica hà mustratu ch'ella avia e pussibilità d'avè a so squadra naziunale di ballò »

U peggju ?

Ognunu hà e so qualità è i so difetti. Pensu ch'ella hè stata longa a cumpagnia, ma micca nomi...

U ghjucadore à quale ai messu vulinteri un tusciu ?

Ùn avia micca preferenze. Tutti l'attaccanti chì venianu in a mo zona di difesa, a sentianu passà. U trattamentu era listessu per ognunu...

À quale ti piacereia à mette ne li unu ?

Vuleria pruvà di piantà à Messi di u FC Barcelona, ancu s'ellu corre assai in furia...

Chì s'hè passatu u 27 di ferraghju di u 1967 à u stadiu Velodrome di Marseglia ?

A Corsica hà mustratu ch'ella avia e pussibilità d'avè a so squadra naziunale di ballò, battendu a Francia 2 à 0.

Ti saria piaciutu à ghjucà in una squadra naziunale corsa ?

I mo caccari eranu corsi è mi saria assai piaciuta à rapresentà l'isula induve aghju sceltu di fà a mo vita, induve mi sentu più chè bè dappoi tanti anni avà...

Intervista realizzata da l'Alisgianincu

C.L.A.M.E
Centru Laser Medica Esteticu

04 95 32 80 01

15 Bd de Gaulle - Piazza San Niculà - BASTIA

Laser medicali
Estetica medica
Benistà



A pippulizzazione di i nomi di i zitelli

In fatti d'onomastica, parlemu sempre di tupunimia. Hè l'antrupunimia chì ci interessa oghje. In l'anni settanta, pruvavanu unepochi di cursizà u so nome. Jacques si facia chjamà Ghjacumu è René, si vulia chjamà Rinatu. Oghje, i zitelli ùn portanu più u nome di i babboni ma di i pippoli...

Hè vera chì serà passata di moda di chjamà si Teramu, Orsu Santu o Orsu Ghjacumu. U nome hè testimoni d'un'epica. In La vita è bella di Roberto Begnini, i dui zitelli ùn si chjamanu unu Adolf è quell'altu Benito ? Oghje, saranu pochi i paulisti à chjamà u so figliolu Pasquale! Ancu più pochi i nazionalisti à chjamà lu Edmondu !

« Ma peghju, vi vidite voi, in u 2030 incù un Alison Zuccarelli à a merria di Bastia ? »

I nomi à a moda ùn sò più quelli di i pulitichi ma di i pippoli. Cusì, i cursachjoli si chjamanu Loana Baldassari, Jessica Grisoni, Jason Rocchi, Kimberley Pasquali, Jakes Palmieri, Britney Susini o Brandon Albertini...

Ma peghju, vi vidite voi, in u 2030 incù un Alison Zuccarelli à a merria di Bastia ? Steevy de Rocca Serra à a presidenza di l'Assemblea ? Johnny Simeoni difende à Bill Colonna ? Brenda Talamoni, capilista di i duri ? Shirley Renucci, merressa d'Aiacciu, Mylène Giacobbi, presidente di u dipartimentu è Marwin Pesce purtā sempre più alta a voce di a Corsica, incù Megane Bernardini, l'arcifigliulina di Ghjuliu ?

Al di là di u ridiculu di certi nomi, hè a psiculugia di sti giovani chì pare addebbulita. Cusì dice u Duttore



Andrew Mac : « Quandu a star vene passata di moda, u zitellu risente un sintimu di murtifilia. Di e volte, quandu si passa bè, finisce in schisufrenia. Altrimente, a morte mediatica di u pippolu annunzia a morte fisica di u zitellu via u so succidiu. »

Allora, per piacè, ùn chjamate micca i vostri figlioli Sgaiuffu, Strega, Mazzone, Katsuni o Sbanditu, chì dopu, saranu capaci à finisce male...

Sbanditu

L'anu detta nant'à apiazzetta.com

à quandu e feste patrunale di Santu Brandon, San Steven è Santa Shirley in i nostri paesi ?
(Ghjuvan-Donovan)

è perchè, truvate chì chjamassi «obé» è e zitelle chì si chjamanu «ofradé», hè megliu ???
(kevinacciu)

U mo paese si chjama Magic Stock

Hè finitu u tempu quandu i Corsi si ne cullavanu in paese a dumenica. I tempi scambianu, toccu u week-end, sò i supermercati chì sò pigliati d'assaltu.

«D'induve si tù ?» hè a quistione ch'elli si ponenu dui Corsi chì ùn si cunnoscenu micca è chì si scontranu. Hè u rituale, per circà di fà cunniscenza è di vede chì sò e rilazioni in cumunu.

Ma a sucetà corsa hè cambiata assai st'ultimi anni (fruttu di a francizazione, a mundializazione o di l'americanizazione, secondu e sfarenti anàlisi...) avà sò e risposte chì cambianu.

Paesi, oghje sò pochi i Corsi à avvenne. Per quelli chì ne anu, ci cullemu pocu è micca. Una settimana l'estate, è ancu... U ligame cù e radiche paisane s'hè scioltu. A Corsica di u Terzu milleniu hè citatina... O ancu peghju : «periurbana»...

« Lochi custruiti à corri corri, senza identità nè memoria »

Sapete, si chjama «périurbain» sta stesa di e cità in l'anticu spaziu campagnolu. Guardate à Bastia : 50 anni fà e piaghje intornu à Biguglia, Borgu, Lucciana o Fulelli eranu terreni coltivati. Avà crescenu villà, «Résidence Belle-Vue»,



hangars è parkings. Lochi custruiti à corri corri, senza identità nè memoria.

È a famiglia sbarcata eri chì si stalla in sti novi casali di Casamozza o d'Arena Viscuvatu, cumu vulete ch'ella s'integressi à u populu corsu, ch'ella s'interessi à a so lingua, à e so tradizioni, à a so cultura ?

I soli punti di riferenza chì li fermanu sò a RN 193 è i lochi di cunsumazione : Coccimarket, La Rocade, Gifi, Flunch, Eurobazar, Le Dénicheur et La Foir'fouille. Òn vale a pena di nigalla, u capitalisimu è u cunsumerisimu ci anu vintu. Oghje, semu cuntenti perchè ghjunghje Leclerc è Leader Price. Trista sorte...

U Sgaiuffu

Occas' Atorra
véhicules d'occasions

Possibilités :
- Crédit
- Achat
- Reprise
- Dépôt / Vente

Rancichi, avà ci vole à pagà !

Qualchì mese fà, avemu lampatu sta chjama contr'à u rancichisimu ind' i bari è altri lochi di suciabilità.

Trà i pericoli chì divastanu a sucetà corsa, aviamu dinunziatu quellu di i castichi umani chì ùn mettenu mai a soia. In u 2008, speravamu chì e lezzione fussinù amparate ma u custattu per u 2009 rimane chjaru : i rancichi ùn volenu sente nunda, sò sempre di più rancichi, è avà, l'affari sò in francese, cume si dice.

L' aviamu dichjaratu per tutti i Santi di u celu : in u 2009, ùn li servimu più ! Eppò...

« Estate 2009 : hè mortu Rigalinu, sta volta ùn li servimu ! »

Intrappulati ind'a notte bastiaccia, pigliati da a cuntentezza di ritruvacci incù l'amichi, biendu un colpu, avemu fallitu... U rancicu chì beie à contu vostru dapoi tanti anni s'affacca, è, ghjuntu u mumentu di mette a vostra, spunta da u bughju... Vi colla è vi fala, perchè avete presu e vostre risoluzione per u 2009, ma quandu formulate a sempiterna quistione « è tù chì bei ? », ùn pudete fà altru chì di dumandalli...

Un mumentu di sulitudine tremendu... Ma ùn semu micca soli à crede chì pudemu cambià e cose, allora, fate u piacè ! Chì a nostra mossa ùn diventi micca una bancarotta ! L'estate s'avvicina, incù e so prumesse di turnate... A lotta cuntinuveghja : avemu persu una battaglia ma micca a guerra ! Forti saremu sè uniti saremu !

Estate 2009 : hè mortu Rigalinu, sta volta ùn li servimu !

We don't serve !

A dice ancu u dizziunariu corsu, à l'articulu turnata : « Inseme di e biende offerte è pagate da qualchidunu in un caffè »... L'umani mettenu a soia !

Bobzombie



**Cunferenza Università Inter-Età
Mercuri 27 maghju à 2 ore
A PITTURA BAROCCA IN CORSICA O A RICUNNISCENZA DI A
SCOLA DI I SECULI XVII È XVIII - FRÉDÉRIQUE VALERY**

À u lindumane di u Cunciliu di Trento, a Chjesa decide di ricunquistà è ricristianizà a pupulazione di l'isula. Tandù sbarcanu veschi è missiunarii per purtà a parolla di a Chjesa in una terra chì hè stata messa da cantu per troppu tempu. À a fine di u seculu XVI, u custatu fattu hè quellu d'un'isula attaccata assai à e so antiche cridenze pagane. Toccu u 1575, hè custruita a catedrale Santa Maria Assunta in Bastia, chì diventa u core di l'arte barocca in Corsica. Si moltiplicheghjanu e cunfraterne è sò custruiti cunventi, chjese è cappelle. À u seculu XVII, Bastia diventa una cità mercante impurtante, hè cusì chì incuragiti da i ricchi dunatori è i sgiò, i pittori taliani stallati in l'isula è l'artisti corsi svilupperanu e so opere d'arte è travaglieranu inseme. Tutti fermanu testimoni di a vita corsa di tandu.

Università di Corsica Pasquale Paoli
Palazzu Naziunale, Corti

**ENTRATA
10 €**

5 € pè i studenti



**Stagione musicale « Corsic'artisti »
Mercuri 27 maghju à 9 ore di sera
CUNCERTU « GHJUVENTÙ IN CANTU »
OMAGIU À A GHJUVENTÙ CORSA**

*Alba Nova
Soni di Corsica*

SPERANZA



A SCIAPPITANA

RISERVAZIONE

04 95 45 00 78
Imnico@univ-corse.fr
www.univ-corse.fr

Università di Corsica Pasquale Paoli,
Spaziu di Cultura Natale Luciani, Campus Mariani, Corti





Sax caffè, Corsica Bar è Penalty



www.ALTA-FREQUENZA.COM
AJACCIO 103.2 / BASTIA 98.9
CORTE 104 / PORTO VECCHIO 93.7
CALVI 87.9 / BONIFACIO 101.2